



**KEMENTERIAN PEMBANGUNAN  
USAHAWAN DAN KOPERASI**  
Ministry of Entrepreneur Development and Cooperatives

## **KENYATAAN MEDIA**

### **PEMERKASA TAMBAHAN BANTU SEKTOR KESIHATAN AWAM DARIPADA LUMPUH DAN MEREDAKAN CABARAN USAHAWAN PKS**

**Putrajaya, 2 Jun 2021** –PEMERKASA Tambahan atau PEMERKASA Plus berjumlah 40 bilion ringgit dengan suntikan langsung fiskal Kerajaan sebanyak 5 bilion ringgit yang telah diumumkan oleh Perdana Menteri Tan Sri Muhyiddin Yassin pada 31 Mei 2021 bakal meredakan cabaran golongan rentan.

Dengan peruntukan 1 bilion ringgit yang telah diumumkan untuk meningkatkan kapasiti dan memperkukuhkan kesihatan awam, dapatlah kiranya membantu petugas barisan hadapan negara daripada 'burnout' dan keletihan. Walaubagaimanapun, lawatan saya ke Pusat Pemberian Vaksinasi (PPV) Masjid Tanah memperlihatkan kesungguhan dan kegigihan 'frontliners' bagi membantu rakyat memerangi COVID-19. Terima kasih kami ucapkan!

Perintah Kawalan Pergerakan 'total lockdown' yang diumumkan bagi tempoh dua minggu bermula hari ini, 1 Jun hingga 14 Jun 2021 yang membawa kepada penutupan semua sektor sosial dan ekonomi kecuali sektor-sektor yang dikategorikan sebagai sektor ekonomi dan perkhidmatan perlu atau 'essential services' sudah pasti akan memberi kesan kepada pendapatan rakyat.

Kerajaan Perikatan Nasional memahami denyut nadi usahawan PKS dengan memberi manfaat menerusi PEMERKASA Tambahan antaranya menerusi :

- Kelulusan moratorium secara automatik selama 3 bulan atau boleh memilih untuk pengurangan bayaran balik secara ansuran sebanyak 50% selama tempoh 6 bulan yang akan dilaksanakan dan bakal memanfaatkan lebih dari 5 juta peminjam dengan nilai sehingga 30 bilion ringgit.

- Pemberian Geran Khas Prihatin atau GKP yang ditambah sebanyak 500 ringgit kepada 1,500 ringgit yang melibatkan hampir 1 juta PKS dan perusahaan mikro
- Pembiayaan mikro kredit sebagai modal kerja, sebanyak 1.5 bilion ringgit disediakan bagi oleh BSN, TEKUN, MARA, SME Corp. dan YAPEIM dengan kadar pembiayaan serendah 3%.
- Institusi perbankan akan terus menawarkan kemudahan pembiayaan dan pinjaman dengan penambahan fasiliti Kemudahan Bantuan dan Pemulihan Bersasar untuk PKS
- Memberi potongan khas kepada pemilik bangunan dan ruang perniagaan yang menawarkan pengurangan sewa premis perniagaan kepada PKS dan bukan PKS untuk tempoh 6 bulan lagi sehingga 31 Disember 2021 bagi pengurangan sewa sekurang-kurangnya 30% daripada kadar sewa semasa.

Dengan pengumuman tambahan ini, diharapkan dapat membantu para usahawan PKS untuk menghadapi kesukaran yang dihadapi. Kementerian Pembangunan Usahawan dan Koperasi (MEDAC) akan terus membantu para usahawan untuk memastikan kelangsungan perniagaan usahawan PKS.

Keputusan jemaah menteri untuk tidak mengambil gaji selama tiga bulan bermula Jun untuk di sumbangkan ke Akaun Amanah Bencana Negara adalah sebagai solidariti Kerajaan dan kepimpinan Perikatan Nasional bersama-sama rakyat dalam perang melawan COVID-19. Ini merupakan langkah prihatin Kerajaan dalam membantu mereka yang terkesan akibat penularan virus ini.

Walaupun keadaan adalah pahit untuk kita telan, keputusan untuk membuat 'total lockdown' bukan satu keputusan semberono. Kita kekalkan untuk duduk di rumah dan patuh kepada SOP yang telah ditetapkan. Sayangi diri, sayangi keluarga dan orang tersayang. Semoga kita boleh kembali kepada sifar kes suatu ketika dulu. Kita pasti menang!

**YB DATUK WIRA HAJAH MAS ERMIEYATI HAJI SAMSUDIN**

**TIMBALAN MENTERI PEMBANGUNAN USAHAWAN DAN KOPERASI**